

pasá, tabata haci uso di burico. Despues a cumenzá usa tractor y riba un dia cu awa tabata yobe masha hopi mes, e tractor a keda pegá den terra y mester a mara cabuya na e wielnan pa poné corre atrobe. E loke a sosodé tabata combersacion di e dia ey y asina e lugar a haña e nomber di Marawiel.

VADER PIET: Un otro lugar banda di costa Norte tin e nomber asombroso di 'Vader Piet'. Na 1829 tabata biba den e barío aki un tal Piet Lampe, un afortunado agricultor, kende tambe tabata tira un bista riba e distrito aki. Piet Lampe a haña su morto na un manera trágico; el a wordo asesiná. Dor di su

bon caracter y tratamento humano pa cu su personal, e tabata wordo yamá Vader Piet, un nomber cu a pasa rond e distrito. Epakico cue lugar no tabata wordo yamá 'Tata Piet' sino 'Vader Piet' (na hulandes) ta pa motibo cu probablemente den e tempo ey famia Lampe tabata papia hulandes na cas.

SAVANETA: e promé capital.

Savaneta ta e colonia di mas bieuw di Aruba, pero e nomber a nace na aña 1840. Probablemente e lugar aki tabata wordo yamá simplemente "e haf" den tempo spañó. Den periodo hulandes e nomber Commandeursbaai a

drenta na vigor.

Durante 1790 e commandeur a bai Ponton y despues pa e ciudad chikito di Paardenbaai; e nomber Commandeursbaai tabata masha poco usá y e lugar a haña e nomber di Savaneta (sabana chikito) na aña 1840, como resultado di e cultura "cochinelle", asina pa distingui Sabana Grandi cu ta situá west di e riw.

SAN NICOLAS of SHON NICOLAS: E centro industrial importante aki, unda e refineria ta situá, ta debe su nacemento na e explotacion di fosfaat na 1879 y despues. El a wordo yamá na un antiano doño di e terreno, Nicolaas v/d Biest. Doñonan di e terreno e tempo ey tabata wordo yamá

dor di nan trahadorman, na nan nomber, pero cu 'Shon' dilanti, por ehempel Shon Nicolas.

For di Shon Nicolas a nace e nomber San Nicolas. E territorio cu ta sera rond di e refineria ta wordo yamá Seroe Colorado, un nomber cu Lago a duna e lugar aki na 1958. E empleadonan di Lago tabata biba na Seroe Colorado.

ORANJESTAD: Bisto ta cu e nomber Oranjestad a nace for die cas gubernamental "Huis van Oranje". E ciudad a nace durante 1790, tempo cu hendenan blanco a bin biba aki. Dor cu Paardenbaai tabata mihor situá cu Commandeursbaai, e habitantenan aki a traha nan cas aki. Un ciudad a nace y na 1796 a traha un forti, Fort

Zoutman, pa protehé e ciudad. E colonia nobo, caminda e commandeur tambe a bai biba, ta wordo yamá Playa.

Durante un bishita di e gobernador na 1824, a papia durante un cena cu varios arubiano, cu e capital mester di un nomber. Asina e capital a haña su nomber Oranjestad. E pueblo di Aruba semper a yam'é Playa. Oranjestad tin cu gradicí su nomber na un bon haf.

LUGARNAN CU ORIGEN INDJAN

Andicuri, Masiduri, Casibari, Daimari, Guadirikiri, Ayo, Huliba, Bushiribana, Canashito, Macuarima (nomber di un cacique), Mahuma, Urataka, Kibaima, Malmok, Manchebo, Basiruti.

